

**Siunnersuut:** Sumiginnaanerit pillugit nalunaaruteqartarnissanut kommunini ataatsimoorussamik oqarasuaammik aalajangersimasumik sianerfigineqarsinnaasamik pilersitsinissaq pillugu kommuninut isumaqatigiinniaqqullugit Naalakkersuisut peqquneqarnissaannik Inatsisartut aalajangiiffigisassaattut siunnersuut. Sianerfigisinnaasatigut nuna tamakkerlugu kalleriutigineqartut tigooqqarneqartassapput, kommuninullu pineqartunut erngertumik ingerlateqqittarnissaat qulakkeerneqassalluni. Ulloq unnuarlu sianerfigisinnaasap ilusilernissaanut Naalakkersuisut kommunit peqatigalugit aalajangiisnaatitaassapput. Siunertarineqartoq, tassaasoq innuttaasut tamarmik pisariungitsumik pisortanut sianersinnaalernissaat sumiginnaanernillu kalleriisnaalernissaat taamaalilluni anguneqassaaq.

(Inatsisartuni ilaasortamit Naaja H Nathanielsenimit saqqummiunneqartoq, Attaviitsoq)

Allanguutissatut siunnersuut:

**Siunnersuut:** Inatsisartunut aalajangiiffigisassanngortinneqarpoq, Naalakkersuisut kommunit suleqatigalugit kommunalbestyrelsinut oqarasuaatikkut allakkatigulluunniit kalleriinissamit pitsaaneruseqarpoq, meeqqap ineriartornera peqqinneraluunniit navianartorsiortinneqarpat.

(Akissuteqaammi siullermeerinninnissamut Naalakkersuisunit saqqummiunneqartoq)

#### **Akissuteqaat**

Ilaqutariinnermut, Naligiissitaanermut, Isumaginninnermut Inatsisinillu atuutsitsinnermut Naalakkersuisoq

#### **Aappassaanneerreqarnera**

Naalakkersuisut sinnerlugit Ilaqutariinnermut Peqqissutsimullu Ataatsimiititaliaq Inatsisartut aalajangiiffigisassaattut siunnersuutip suliarineqarnerannut atatillugu sukumiisumik sulisimanera pillugu qutsavigissavara.

Ataatsimiititaliap aallaqqaammut siunnersuutaasoq isumaliutissiissutimini itigartinneqassasoq inassutigaa Naalakkersuisullu allanguutissatut siunnersuutaata akuerineqarnissaa inassutigalugu.

A) Ataatsimiititaliap isumaliutissiissutimini Naalakkersuisut qinnuigai qaqugukkut kommunimut nalunaarutiginninnani politiinut siullertut nalunaarutiginnittoqartarnissaa pillugu oqaaseqaatinik itisiliissutaasunik saqqummiusequllugit.

Naalakkersuisut tassunga atatillugu oqaatigissavaat:

Kinaluunniit meeqqamik peqqissutsimigut ineriartornermigulluunniit navianartorsiortinneqarluni atugaqartinneqartumik paasisaqaruni kommunalbestyrelsimut nalunaaruteqarnissaminik pisussaaffeqarpoq, tak. Meeqqanik inuusuttunillu ikiorsiisarneq pillugu Inatsisartut peqqusutaanni nr. 1, 15. april 2003-meersumi § 5. Maleruaqqusaq tamanna politiinut nalunaaruteqarnissamut taarsiullugu atuutsinneqassanngilaq imaluunniit atorunnaarsinneqassanngilaq.

Politiinut nalunaarutiginninneq taamaammat pissaq kommunalbestyrelsimut nalunaarutiginninissaq sioqqullugu, nalunaarutiginninnermut peqatigitillugu imaluunniit nalunaaruteqarnerup kingorna. Kommunalbestyrelsimut nalunaarutiginnittoqartillugu inunnik isumaginnittoqarfiup misissuisussaataani aallartissavaa aamma politiinut nalunaarutiginnittoqartillugu politiit misissuisussaataanertik aallartissavaat. Oqartussaasut assigiinngitsut marluupput taamalu misissuinerit assigiinngitsut marluullutik. Politiit misissussavaat pinerluuteqartoqarsimanersoq aamma pillagassanngortitsisoqassanersoq. Kommunalbestyrelsip misissussavaa sumiginnaasoqarsimanersoq aamma isumaginninnikkut iliuuseqarnissamik neqerooruteqartoqassanersoq. Politiinut nalunaarutiginninneq ingerlaannartumik pisariaqarpoq, tassa sumiginnaaneq pinerluuteqarnermik pisimassappat, assersuutigalugu meeqqamik kinguaassiuutitigut atonerluineq, nakuuserneq imaluunniit allatut annertuumik paarsinerlunneq pillugit paasissutissanik imaqassaaq. Pingaaruteqarporli erseqqissaassutigissallugu sumiginnaaneq pinerluuteqarnermik pisimanersoq pillugu kommune nalilersuissanngimmat, tassa tamanna politiinit nalilersorneqartussaammat. Taamaammat tunngaviatigut kommune politiinut nalunaaruteqartussaasariaqarpoq, tassa nalunaarut annertuumik sumiginnaanermik imaqarpat, taamalu inunnik isumaginnittoqarfimmi sulisut misissuinerimik aallartitsinerat ilutigalugu politiit misissuinerit aallartittassavaat. Timitigut uppernarsaatit, soorlu nakuuserfigineqarnerup piliaanik tiluusat aamma pisumik eqqaamanninnerit sukkasuumik peeruttarput, taamaammat nalunaarummik politiit piaartumik pissarsigunik namminneq misissuipallannerusinnaassapput. Pingaaruteqarpoq oqaatigeqqissallugu misissuinerit taakku marluk assigiinngitsuusut, taamaammallu politiinut nalunaarutiginnittoqarnera pissutiginnarlugu kommunip misissuinini unitsissanngilaa, soorlu aamma politiinut nalunaarutiginnittoqassanngitsuoq isumaginnittoqarfiup isumaginninnikkut misissuilluni aallartissimanera pissutiginnarlugu.

B) Ataatsimiititaliap aamma isumaliutissiissutimini Naalackersuisunut nassuiaatigeqquaa siusissukkut orniguttarlunili iliuuseqartoqartarnissaa Naalackersuisunit qanoq qulakkearniarneqarnerisooq, tassungalu ilanngullugu tamanna pillugu kommunit akisussaaffeqarnerat pillugu suliassaqarfimmi inatsisissatut siunnersuutissami maleruagassiorneqarniarnerisooq siunnersuutip matuma aappassaaneerneqarnissaanut. Sumiginnaanerup annikillisarneqarnissaa siunertarlugu siusissukkut orniguttarlunili iliuusissat kommuninit qanoq ingerlanneqassanersut inatsimmi erseqqissaanissaaq pisariaqartinneqarnerisooq naalackersuinikkut ilanngullugu nalilersorneqarpat tassunga ilanngullugu naleqquttuussaaq.

Naggasiutigalugu nassuiaatigissavara:

Naalackersuisut meeqqanut tunngatillugu inatsit annertuumik pitsaanerulersinneqarsimasooq UKA2016-imi saqqummiutissavaat, taassuma maanna meeqqanik inuusuttunillu ikiorsiisarneq pillugu Inatsisartut peqqussutaat maanna atuuttoq taarsissavaa.

UKA2016-imut siunnersuut nutaaq taaguuteqarpoq Meeqqanut ikiorsiisarneq pillugu Inatsisartut inatsisissaattut siunnersuut, imarivaalu inatsisip oqaasertaanik paasinninnissamut nassuiaatit suliarilluakkat eqqortullu. Siunnersuut 2016-imi 27. maajimiit 30. junimut tamanut tusarniaassutigineqarpoq. Siunnersuut aqquutigalugu iliuuseqartussaaneq aamma kommunip nalunaarutinik tigusinissaanut suliarinninnissaannullu maleruagqusat atuutsinneqalerput, soorlu isumaginninnermik suliaqartut qaqugukkut misissuinerimik aallartitsisarnissaannut aamma qaqugukkut qanorlu iliuusissatut pilersaarusiortoqartassanersoq pillugit piffissaliussat ilanngunneqartut. Inatsisissatut siunnersuut nutaaq taanna angusaqarluarniarfiuvoq, imaraalu

angajoqqaanngortussat pillugit siusissukkut iliuseqarnissamut aalajangersakkat angajoqqaar-siaasartullu nukittorsaaffigineqarnissaat kiisalu ulloq unnuarlu paaqqinniffinnut piunasaqaatit sakkortunerit aamma meeqqat ulloq unnuarlu paaqqinniffinnit angerlartinneqarnissaannut periusissat nutaavissuit.

Inatsisissatut siunnersuut taanna nutaaq aqputigalugu suliaqarfimmi inatsimmik nutarsaanis-samik eqqortumillu inatsiseqarnissamik pisariaqartitsineq naammassineqassaaq.

Taamatut oqaaseqarlutik Naalakkersuisut Ataatsimiititaliamit inassuteqaatit akuersaarpaat.